

**TEKS UCAPAN
YANG DIPERTUA
MAJLIS PERBANDARAN SEBERANG PERAI
MAJLIS PELANCARAAN SISA SIFAR TAMAN VILLA OREN,
BUKIT MERTA JAM
09 JANUARI 2016 (SABTU), 2.00 PM**

Yang Berusaha Tuan Sr Hj Rozali bin Hj Mohamud

Tuan Setiausaha Perbandaran MPSP

Yang Berusaha Puan Sharon Song

Wakil Pengerusi Perbadanan Pengurusan Taman Villa Oren

Ketua - ketua Jabatan

Penghuni-penghuni Taman Villa Oren

Rakan - rakan Media

Tuan - tuan dan puan - puan yang dihormati sekalian

.....

Assalamualaikum warahmatullahi wabarakatuh, Selamat petang dan salam sejahtera,

1. Terlebih dahulu saya ingin merakamkan jutaan terima kasih kerana sudi menjemput saya ke Majlis Pelancaran Sisa Sifar Taman Villa Oren pada hari yang berbahagia ini.

Para Hadirin yang dihormati sekalian,

2. Bagi makluman semua, Taman Villa Oren mempunyai 131 unit rumah dan kini 50 buah telah didiami. Terima kasih kepada pengurusan kerana sudi mengambil bahagian dalam program sisa sifar bersama MPSP.

3. Program jalinan kerjasama antara Pengurusan Taman Villa Oren dan MPSP ini dapat dilaksanakan selepas ceramah kitar semula diadakan pada 18 Oktober 2015. Disamping itu, risalah-risalah berkaitan dengan pengasingan sisa punca juga diedarkan kepada penduduk. Keterbukaan pihak Pengurusan Taman Villa Oren dalam menerima MPSP untuk menjalankan program sisa sifar merupakan satu langkah permulaan yang penting untuk membentuk sebuah komuniti yang lestari.

4. Sisa sifar merupakan satu elemen yang penting kerana semakin kurang sampah yang dihasilkan, maka kita dapat memanjangkan jangka hayat tapak pelupusan sampah yang sedia ada iaitu di Pulau Burung. MPSP membelanjakan RM 8,096,269.08 bermula dari Jan 2015 sehingga November 2015 untuk menguruskan 400,805.40 tan sampah di Tapak Pelupusan Pulau Burung. Kos ini hanya Kos "Tipping Fees" di Pulau Burung, tidak termasuk gaji, kos minyak dan penyelenggaraan kenderaan. Lebih daripada 50 % sampah yang dibuang oleh penduduk Seberang Perai merupakan sisa domestik. Jika kita dapat menjalankan kitar semula dan pengkomposan, ia dapat mengurangkan banyak sampah yang dihantar ke tapak pelupusan. Oleh itu, kerjasama diantara komuniti seperti Pengurusan Taman Villa Oren dan MPSP dalam program-program seperti ini amat dialu-alukan kerana ia memupuk satu

ikatan kearah mewujudkan betapa pentingnya kita mengurangkan penjanaian sisa pepejal atau sampah sarap.

5. MPSP telah memulakan kempen program sisa sifar pada tahun 2010. Sasaran bagi program ini adalah sekolah-sekolah, kilang dan komuniti. Untuk menjayakan kempen Program Sisa Sifar ini, konsep 4R telah diperkenalkan, iaitu *Rethink, Reduce, Reuse dan Recycle*. Konsep ini mengajak masyarakat berfikir terlebih dahulu sebelum menghasilkan sampah.

6. Jika dilihat dari penglibatan komuniti, Perbadanan Pengurusan Pangsapuri Taman Pandan dan Pangsa Tanjung Indah di Butterworth, merupakan komuniti yang telah berjaya dalam Program Sisa Sifar.

7. Dari segi perindustrian pula, Kilang SONY di Perai boleh diambil sebagai contoh yang baik kerana telah mencapai 96% pengurangan sisa (*waste diversion*) ke Tempat Pelupusan Sampah Pulau Burung.

8. Bagi program sisa sifar di Taman Villa Oren, Bukit Mertajam, sempena dengan hari pelancaran, tong 5 liter untuk mengisi sisa organik akan diedarkan. Bagi makluman, sasaran ditetapkan adalah terbahagi kepada tiga perkara iaitu:

1. Bahan-bahan pepejal yang tidak boleh dikitar semula dibuang sebagai sampah.
2. Bahan-bahan pepejal yang boleh dikitar semula.
3. Sisa organik pula akan dikumpulkan untuk tujuan dikompos.

Jika program ini berjaya, dianggarkan sekurang-kurangnya 80% sisa pepejal dapat dikurangkan dari dihantar ke tapak pelupusan. Bagi sisa organik, ianya boleh dikumpul dalam tong dan diletakkan di depot sampah di luar taman ini. Pada permulaannya MPSP akan mengutip untuk pengkomposan, namun MPSP berharap pekerja pembersihan taman ini dapat membuat kompos sendiri. Selain itu, semua sisa organik yang dikumpul akan direkodkan.

Para hadirin yang dihormati,

9. Bagi peringkat Negeri Pulau Pinang, tarikh penguatkuasaan bagi semua lapisan masyarakat melaksanakan pengasingan sisa di punca adalah pada 1 Jun 2016. Kita memilih untuk melaksanakan pengasingan sisa di punca kepada dua (2) aliran sahaja iaitu, barangan yang boleh dikitar semula (kering) dan sampah (termasuk sisa makanan). Manakala mekanisma pengasingan sisa di punca adalah berbeza bagi setiap institusi berikut, yang terbahagi kepada :

- **Rumah kampung**, yang mana pihak Jawatankuasa Kemajuan dan Keselamatan Kampung (JKKK) memainkan peranan melaksanakan Dasar Pengasingan Sisa di Punca dengan melantik agen untuk mengutip barangan kitar semula tersebut.
- **Projek Perumahan Rakyat (PPR)** dan **Kondominium** pula *Joint Management Body* yang akan memainkan peranan melaksanakan dasar ini dari segi penyediaan tempat kitar semula, saiz tong yang bersesuaian dan juga dari segi aspek perlantikan agen untuk kutipan barangan tersebut.

- Untuk kediaman di kawasan **Taman Perumahan**, setiap penduduk perlu melaksanakan dasar ini dan diamalkan dalam kaedah melupuskan sampah masing-masing. Rangkaian kitar semula yang sedia ada dikekalkan, dan pihak PBT akan mengutip barangan kitar semula yang tidak diambil oleh agensi kitar semula.
- **Komersial dan industri**, pihak pengurusan ke atas dua entiti tersebut dipertanggungjawabkan sepenuhnya ke atas pelaksanaan dasar pengasingan sisa dipunca. Pihak pengurusan juga berhak menetapkan kekerapan kutipan barangan tersebut.

Hadirin yang dirahmati,

11. Program sisa sifar ini secara langsung dapat mendidik penghuni Taman Villa Oren khususnya, dan masyarakat amnya, untuk menjadikan pengasingan sisa di punca sebagai satu amalan harian. Bermula dari tempat kerja, hinggalah ke dalam institusi kekeluargaan maka pengemblengan kedua-dua institusi ini pasti dapat menjadikan Seberang Perai dan sekaligus Pulau Pinang sebuah negeri yang mengamalkan pengasingan sisa di punca dengan jayanya.

Dengan harapan itu, saya melancarkan Program Sisa Sifar di Taman Villa Oren, Bukit Mertajam.

Sekian, terima kasih.